

Privredne komore su preduslov uspješnog poslovanja

Mala i srednja preduzeća su bili glavni pokretači ekonomskog oporavka u ostalim evropskim zemljama, i tu istu ulogu bi mogli odigrati i u Bosni i Hercegovini.

“U poslijeratnoj Njemačkoj, kao i u mnogim drugim evropskim zemljama, ekonomski oporavak je osiguran zahvaljujući malim i srednjim preduzećima”, rekao je visoki predstavnik, Christian Schwarz-Schilling na današnjem sastanku sa direktorima privrednih komora iz BiH.

“Kao bivši direktor jednog srednjeg preduzeća upoznat sam sa izazovima s kojima se suočava takvo preduzeće, a takođe mi je poznato da je preduzećima potrebno efikasno predstavljanje kako bi se uspješno nosili sa ovim izazovima”, rekao je visoki predstavnik.

“U Njemačkoj, privredne komore igraju značajnu i konstruktivnu ulogu na taj način što lobiraju u ime preduzeća privlačenjem pažnje zakonodavaca, zaobilaženjem birokratskih prepreka, i ohrabrivanjem preduzeća da dijele među sobom svoja iskustva i ekspertizu. Smatram da komore u BiH mogu djelovati na isti način.”

Današnjem sastanku kojim je predsjedavao prvi zamjenik visokog predstavnika Larry Butler prisustvovali su predsjednik Vanjskotrgovinske komore BiH Mahir Hadžiahmetović, predsjednik Privredne komore Federacije BiH, Avdo Rapa, predsjednik Privredne komore Republike Srpske, Mladen Mičić, kao i ostali predstavnici komora.

Do ukidanja sistema obaveznog članstva na entitetskom nivou (i obaveznog plaćanja naknade za članstvo) koje je obavljeno u okviru Buldožer reforme 2004. godine, sva preduzeća

registrovana u BiH su automatski morala plaćati za održavanje i funkcionisanje komora. Od 2004. godine naovamo, entitetske komore su bile u takvoj situaciji da su morale ubijediti preduzeća da se članstvo isplati. Privredna komora Republike Srpske je uspjela zadržati svoje članstvo (i prihode) tako što je uvela sistem kvalitetnog upravljanja i preduzećima ponudila širi spektar usluga.

Na današnjem sastanku je, između ostalog, razgovarano o tome kako se iskustvo Privredne komore Republike Srpske može primijeniti i na ostale komore u BiH, kako bi poboljšale svoje kapacitete i konkurentnost. Povod za odluku o učlanjenju u komoru trebalo bi bude sposobnost komore da zagovara interese svojih članova (iako obavezno članstvo mora biti poštovano kada je propisano zakonom).

Svi učesnici su se složili da bi privredne komore u BiH mogle snažnije podržati ekspanziju sektora malih i srednjih preduzeća u okviru kojeg se počinju otvarati nova radna mjesta. Ovaj sektor bi se, ipak, mogao razvijati puno brže ako bi se poslovna zajednica angažirala na efikasnijem lobiranju kod vlasti da usvoje i provedu dodatne reforme kako bi unaprijedili poslovno okruženje.